



108 հոգի ավարտել է Հայաստանի Ամերիկյան համալսարանի ՔՀԿ կարողությունների զարգացման հավաստագրային ծրագիրը

Եվրամիության կողմից ֆինանսավորվող «Կառուցողական երկխոսության հանձնառություն» ծրագրի շրջանակում տեսական և պրակտիկ դասընթացների արդյունքում 108 քաղհասարակության կազմակերպության (ՔՀԿ) ներկայացուցիչ ստացան հիմնարար գիտելիքներ ու հմտություններ՝ հանրային քննարկումների և որոշումների ընդունման դեպքում իրենց ձայնը լսելի և ազդեցիկ դարձնելու համար:

2017 թվականի դեկտեմբերի 4-ից մինչև այս տարվա փետրվարի 2-ը Հայաստանի ամերիկյան համալսարանի նոր կրթական հավաստագրային ծրագիրն ավարտել է Երևանում և հայաստանյան 8 մարզում գործող ՔՀԿ ներկայացուցիչներ: 108 շրջանավարտներից 66-ը կանայք են, 42-ը տղամարդիկ:

«Կան համընկնող շահեր, դրանք կարելի է համակարգել, ստեղծել կոալիցիա, համախմբված հզոր ուժ լինել: Կոալիցիաների դեպքում մեր հնարավորություններն ավելի հզոր են, քան առանձին ՔՀԿ-ների դեպքում, ու դրանք հանրային քաղաքականության մեջ արդյունքի հասնելու ճանապարհն են», - նշեց դասընթացի շրջանավարտ, «Հայաստանի ՓՄՁ հաշվապահների ասոցիացիայի» ներկայացուցիչ Լիլիթ Զիչոյանը և հավելեց, որ արդեն իսկ մտքեր կան այս ուղղությամբ:

Արթիկի շրջանի «Մարդկային կապիտալի զարգացման կենտրոնի» ներկայացուցիչ Մելսիդա Կիկոյանը նույնպես խոսեց ստացած գիտելիքների կարևորության մասին. «Ես այժմ ունեմ այն գիտելիքները, որպեսզի կարողանանք ավելի արդյունավետ համագործակցել տեղական ինքնակառավարման և պետական կառավարման մարմինների հետ, մասնակցել նրանց կողմից մշակվող հանրային քաղաքականությունների քննարկումներին և նույնիսկ ազդեցիկ լինել ընդունվող որոշումների դեպքում»:

Կրթական ծրագրի շրջանակներում մասնակիցները ուսուցանվել են հանրային քաղաքականությունների մշակման, հանրային բյուջեների ու քաղաքականությունների մշտադիտարկման, կոալիցիաների կառուցման և ՔՀԿ-կառավարություն կառուցողական երկխոսության թեմաներով:

Նշենք, որ կրթական ծրագիրն իրականացվելու է ընդհանուր առմամբ 120 ՔՀԿ ներկայացուցիչների համար՝ Երևանից և մարզերից:



«Կառուցողական երկխոսության հանձնառություն» ծրագիրն իրականացվում է ԵՄ ֆինանսավորմամբ՝ «Իրավաբանների հայկական ասոցիացիա» ՀԿ-ի կողմից գործընկերներ «Ագորա Սենթրլ Յուրովի» ՀԿ-ի (Չեխիա), «Ժողովրդավարական կրթության հայկական կենտրոն-ՄԻՎԻՏԱՍ» ՀԿ-ի, «Մարդկային զարգացման միջազգային կենտրոն» ՀԿ-ի, «ՓՄՁ համագործակցության ասոցիացիա» ՀԿ-ի և «Հայաստանի համայնքների միություն» իրավաբանական անձանց միության հետ համագործակցությամբ:

Ծրագրի նպատակն է մեծացնել քաղաքացիական հասարակության կազմակերպությունների (ՔՀԿ) և դրանց կոալիցիաների/ցանցերի ազդեցությունը հանրային քաղաքականության մշակման գործընթացի վրա: Մա հնարավորություն կտա կազմակերպություններին (ովքեր արդեն իսկ աշխատում են թիրախային կոալիցիաներում) ձեռք բերել նոր ռեսուրսներ, քաղաքացիական փորձագետներին միավորել և խրախուսել իրենց մասնակցությունը տեղական և ազգային քաղաքականությունների օրակարգի ձևավորմանը, հատկորոշել ընդհանուր խնդիրներն ու առաջնահերթությունները և դիմել կառավարությանը՝ կառուցողական և ռազմավարական քաղաքականության վերաբերյալ նախաձեռնություններով:

Ծրագրի շրջանակներում ենթադրամաշնորհներ կտրամադրվեն ՔՀԿ-ներին և ՔՀԿ-ների կոալիցիաներին, որոնք կողմնակցեն հանրային քաղաքականությունների զարգացմանն ու կունենան շոշափելի արդյունքներ 9 թիրախային ոլորտում, որոնցից են արդարադատությունը, կրթությունը և բիզնեսը:

Իրավաբանների հայկական ասոցիացիան (ԻՀԱ) ստեղծվել է 1995թ.-ին: ԻՀԱ-ի առաքելությունն է նպաստել Հայաստանում իրավունքի գերակայության, ժողովրդավարության և քաղաքացիական հասարակության կայացմանը, որտեղ բնակչությունն իրագել է, իսկ նրա իրավունքները՝ պաշտպանված: Մինչև 2016 թ. փետրվար ամիսը ԻՀԱ-ի անվանումն էր Հայաստանի երիտասարդ իրավաբանների ասոցիացիա:

Աստղիկ Կարապետյան
Հանրային կապերի համակարգող

Հեռ.՝ 540199
Էլ. Հասցե՝ info@armla.am
Կայք՝ <http://www.armla.am>, <http://ccd.armla.am>



Ծրագիրը ֆինանսավորվում է Եվրոպական միության կողմից:

Հայաստանում Եվրոպական միության պատվիրակություն

Հեռախոս՝ +37410 54 64 94

Իրավաբանների հայկական ասոցիացիա

Հասցե՝ Նալբանդյան 7, բն. 2 Երևան, Հայաստան, 0010

Հեռախոս՝ +37410 54 01 99

Եվրահանձնաժողովը ԵՄ գործադիր մարմինն է: Եվրամիությունն ունի 28 անդամ երկիր, որոնք որոշել են աստիճանաբար կապակցել իրենց նոու-հաուն, ռեսուրսներն ու ուղիները: 50 տարվա քնդարձակման ժամանակահատվածում նրանք միասին ստեղծել են կայունության, ժողովրդավարության ու կայուն զարգացման տարածք՝ պահպանելով մշակութային զանազանությունը, հանդուրժողականությունը և յուրաքանչյուրի անկախությունը: Եվրամիությունը հանձնառու է կիսել իր ձեռքբերումներն ու արժեքները իր սահմաններից այն կողմ գտնվող երկրների ու ժողովուրդների հետ: